



Sekretariat mahasiswa Negeri Sembilan gigih buat persediaan bantu calon STPM

Menyedari peranan mahasiswa universiti dalam menyumbang bakti terhadap pelajar luar bandar yang bakal menduduki peperiksaan Sijil Tinggi Pelajaran Malaysia pada tahun ini, Sekretariat Mahasiswa Negeri Sembilan Universiti Malaysia Pahang (UMP) mengikuti latihan *Training of Trainers* (TOT) di Kem Bina Negara Alor Gajah Melaka pada 16 Mac 2014 yang lalu.

Seramai 19 mahasiswa UMP menyertai program ini yang diadakan melibatkan penyertaan 20 persatuan yang mewakili mahasiswa anak Negeri Sembilan dari seluruh Institusi Pengajian Tinggi Awam (IPTA) lain.

Menurut Yang diPertua Sekretariat Mahasiswa Negeri Sembilan UMP, Mohd Najmi Harith, program ini dianjurkan sebagai persediaan mental dalam menggilap bakat mahasiswa ini untuk memberi motivasi dan semangat kepada kumpulan sasaran dalam program akan datang melibatkan pelajar prauniversiti yang menuntut di sekolah luar bandar.

Selain itu, program ini berjaya menyatukan hampir seluruh persatuan

dan sekretariat Mahasiswa Negeri Sembilan di bawah satu bumbung seterusnya menjayakan program latihan fasilitator yang dijalankan di Pusat Latihan Hutan Percha anjuran Majlis Mahasiswa Negeri Sembilan (MANIS) yang mendapat sokongan penuh daripada Kerajaan Negeri Sembilan.

“Program Motivasi Jil Al Qiyadi yang bakal diadakan nanti adalah salah satu usaha kami dalam memberikan dorongan untuk berjaya khususnya dalam bidang akademik dan persiapan sebelum melangkah ke menara gading.

“Program ini diibaratkan sebagai program sekolah angkat, yang mana persatuan ataupun sekretariat mahasiswa Negeri Sembilan di sesebuah universiti itu akan menjadi mentor terhadap pelajar tingkatan enam ini,” katanya.

Tambah beliau, mahasiswa akan membimbing dan memberi motivasi dan tunjuk ajar secara berterusan kepada pelajar menerusi media sosial termasuk *facebook*, *whatsApp* dan *tweeter* sebagai cara berkomunikasi.

Turut diadakan pada tahun ini adalah

program selangkah ke universiti, program motivasi dan jati diri serta program solat hajat dan doa selamat yang bakal melibatkan 27 sekolah di Negeri Sembilan. Antaranya adalah SMK Mantin, Nilai, SMK Sheikh Ahmad, Seremban, SMK Tuanku Ampuan Durah, SMK Seri Ampangan Seremban dan SMK Seri Pagi, Senawang.

Sementara itu, peserta program dari Fakulti Sistem Komputer & Kejuruteraan Perisian, Nurul Aimi Hazwani Mazlin, 21 berkata, peserta turut digalakkan bercakap di hadapan orang ramai bagi menambah keyakinan diri sebagai persiapan menjadi fasilitator kelak.

Begitu juga dengan pelajar dari Fakulti Kejuruteraan Elektrik & Elektronik, Nur Afiqah Alias, 23 yang berharap dapat mempraktikkan ilmu yang dipelajari terutamanya dalam menghargai masa, mengenal pasti kelebihan dan kekurangan diri sendiri, cara menangani dan memberi kritikan serta meningkatkan kemahiran berkomunikasi. Dalam program ini, para peserta mengikuti latihan dalam kumpulan, kuiz sejarah Malaysia, perbarisan dan program “*Night Walk with Blind Eyes*” .